

Las DVDs «La Tevletta» e «La Tabletta»

Publicaziuns SRR

■ (cp) La retscha «Cudeschs digitals» da nossa fibla è ussa cumpletta. Suenter che «Mia Fibla» (sursilvan) è cumparida il december 2007, «La Fibla» (surmiran) la stad 2009, vegnan ussa era «La Tevletta» (puter) e «La Tabletta» (vallader) en furma digitala sin fiera.

Persvadida da la gronda valor da quest'ovra, aveva l'Uniuin dals Grischs procurà il 1984 per in'ediziun revedida ed adattada a l'ortografia actuala e cun ina successiun per part differenta a l'originala. Malgrà ch'ins po anc oz cumprar las versiuns restampadas, ha l'Institut dal DRG decidì d'edir tuttina la versiun originala en furma digitala per complettar uschia sia retscha da «Cudeschs digitals» da nossa fibla cun agiunter mintgamai in pitschen excurs en l'istorgia dals emprims cudeschs da leger per las regiuns. Artur Cafilisch (1893–1971), scolast e poet ladin, ha concepì e scrit la versiun originala rumantscha «La Tevletta» en puter e l'artist Philipp Arlen (1876–1944) ha fatg las illustraziuns. Quest cudesch per l'emprima classa è cumparì per l'emprima giada l'onn 1932. Las DVDs cuntengan mintgamai las 78 paginas da «La Tevletta», resp. da «La Tabletta», en singuls maletgs cun in'auta resoluziun, l'Intraguidamaint da l'autur Artur Cafilisch, il Pream da l'ediziun revisa da l'Uniuin dals Grischs, in document PDF en bassa resoluziun ed er in pitschen excurs en l'istorgia dals emprims cudeschs da leger per l'Engiadina. Vus pudais

stampar quellas paginas per adiever privat. Il dretg da tut las ulteriuras applicaziuns pussaivlas resta dentant tar l'Institut dal DRG.

Las DVDs «La Tevletta» e «La Tabletta» pon ins retrair directamain da l'Institut dal DRG per CHF 50.– al toc.

